

Samþykkt fyrir stjórnkerfis- og lýðræðisráð Reykjavíkurborgar

Umboð

1. gr.

Stjórnkerfis- og lýðræðisráð starfar í umboði borgarráðs með þeim hætti sem nánar er kveðið á um í samþykkt þessari og samþykkt um stjórn Reykjavíkurborgar og fundarsköp borgarstjórnar nr. 715/2013 og eftir því sem lög mæla fyrir um.

Verksvið

2. gr.

Stjórnkerfis- og lýðræðisráð skal móta stefnu í stjórnkerfis- og lýðræðismálum, taka ákvarðanir og gera tillögur til borgarráðs hvað varðar verksvið þess. Jafnframt hefur ráðið eftirlit með stjórnsýslu borgarinnar og að samþykktum og stefnumörkun þess sé fylgt. Þá fer ráðið með önnur þau verkefni sem borgarráð felur því.

Umboðsmaður borgarbúa heyrir stjórnskipulega og fjárhagslega undir stjórnkerfis- og lýðræðisráð en nýtur faglegs sjálfstæðis og er að öllu leyti óháður fyrirmælum frá ráðinu. Um samskipti umboðsmanns borgarbúa og stjórnkerfis- og lýðræðisráðs gilda verklagsreglur sem unnar eru í samvinnu beggja aðila.

Skrifstofa borgarstjóra og borgarritara annast framkvæmd stefnu og verkefna ráðsins og samskipti við aðrar stofnanir borgarinnar.

3. gr.

Stjórnkerfis- og lýðræðisráð hefur umsjón með skipulagi stjórnkerfis Reykjavíkurborgar. Ráðið fer einnig með verkefni sem viðkoma lýðræði, samráði og þátttöku borgarbúa. Þá fer stjórnkerfis- og lýðræðisráð með það verkefni að auka gagnsæi í stjórnsýslu borgarinnar og gera þjónustu við borgarbúa skilvirkari, markvissari og sýnilegri. Auk þess skal stjórnkerfis- og lýðræðisráð stuðla að skilvirkri nýtingu upplýsingatækni í þágu stefnumörkunar borgarinnar.

Til þess að vinna að markmiðum skv. 2. gr. hefur stjórnkerfis- og lýðræðisráð m.a. með höndum eftirtalin verkefni:

A. Á sviði stjórnkerfismála:

1. Er borgarráði og öðrum borgaryfirvöldum til ráðuneytis á sviði stjórnkerfisbreytinga.
2. Hefur frumkvæði að tillögum til borgarráðs um breytingar á stjórnkerfinu.

B. Á sviði lýðræðismála:

1. Gerir tillögur til borgarráðs um íbúalýðræði, samráð og þátttöku borgarbúa.
2. Gerir tillögur til borgarráðs um gagnsæi stjórnsýslunnar.
3. Gerir tillögur til borgarráðs um hlutverk hverfisráða og skipulag nærþjónustu.

C. Á sviði þjónustumála:

1. Er borgarráði og öðrum borgaryfirvöldum til ráðuneytis á sviði þjónustu.
2. Gerir tillögur til borgarráðs um þjónustutengd verkefni, fyrirkomulagi þjónustu og þjónustuveitingu.

D. Á sviði upplýsingatæknimála:

1. Er borgarráði og öðrum borgaryfirvöldum til ráðuneytis á sviði upplýsingatæknimála
2. Hefur frumkvæði að tillögum til borgarráðs um mál tengd upplýsingatækni.
3. Gerir tillögur til borgarráðs um verkefni í rafrænni þjónustu.

E. Vegna umboðsmanns borgarbúa:

1. Afgreiðir starfsáætlun umboðsmanns borgarbúa og hefur eftirlit með að tillögur í frumvarpi að fjárhagsáætlun séu í samræmi við starfsáætlun og mótaða stefnu.
2. Hefur umsjón með að tilmæli og álit umboðsmanns borgarbúa fái viðeigandi skoðun og meðferð innan stjórnkerfis Reykjavíkurborgar.

Ágreiningi um hvort tiltekið erindi heyri undir ráðið ber að vísa til borgarráðs.

4. gr.

Stjórnkerfis- og lýðræðisráð skal í störfum sínum fylgja almennum samþykktum borgarstjórnar og borgarráðs s.s.:

1. Heildarstefnukort
2. Starfsmannastefnu
3. Upplýsingastefnu
4. Upplýsingatækni- og gagnastefnu
5. Mannréttindastefnu
6. Innkaupastefnu og innkaupareglum
7. Umhverfisstefnu – Reykjavík í mótun
8. Reglum um auglýsingu og afgreiðslu almennra styrkumsókna
9. Reglum um meðferð trúnaðarupplýsinga
10. Stefnu í erlendum samskiptum
11. Siðareglum
12. Leikreglum með fjárhagsáætlun
13. Leikvallastefnu
14. Hjólreiðaáætlun
15. Samgöngustefnu
16. Umferðaröryggisáætlun

- 17. Ferðamálastefnu
- 18. Menningarstefnu
- 19. Forvarnarstefnu

Skipan

5. gr.

Stjórnkerfis- og lýðræðisráð er skipað 7 fulltrúum kjörnum af borgarstjórn og jafnmörgum til vara. Borgarstjórn kýs formann og skal hann vera borgarfulltrúi eða fyrsti varaborgarfulltrúi. Ráðið kýs sér varaformann og skiptir að öðru leyti með sér verkum. Kjörtímabil ráðsins er hið sama og borgarstjórnar.

Framboðslista sem á fulltrúa í borgarstjórn er heimilt skv. samþykkt um stjórn Reykjavíkurborgar og fundarsköp borgarstjórnar nr. 715/2013 að tilnefna borgarfulltrúa eða varaborgarfulltrúa til að sitja fundi ráðsins með málfrelsi og tillögurétt, eigi hann ekki fulltrúa í ráðinu.

Stjórnkerfis- og lýðræðisráð getur í sérstökum tilfellum skipað undirnefndir, starfs- eða vinnuhópa til að fjalla um afmarkaða málaflokka. Slíkum nefndum og hópum skal setja erindisbréf þar sem skilgreind eru helstu verkefni og starfinu sett tímamörk. Tilkynna skal um skipan allra undirnefnda, starfs- og vinnuhópa til borgarráðs.

Verkstjórn og verkaskipting

6. gr.

Formaður ráðsins er í forsvari fyrir það um stefnumótun og ákvarðanir þess, eftir því sem við á, og hefur ásamt öðrum fulltrúum í ráðinu eftirlit með framkvæmd mótaðrar stefnu í málaflokknum.

Borgarritari ber ábyrgð á framkvæmd ákvarðana ráðsins.

Boðun funda og fundarsköp

7. gr.

Stjórnkerfis- og lýðræðisráð heldur að jafnaði tvo fundi í mánuði. Formaður getur boðað til aukafunda eftir þörfum. Komi fram ósk þriggja ráðsmanna um fund í ráðinu ber að verða við því. Fella má niður fundi í alls tvo mánuði að sumarlagi.

Formaður boðar til funda, ákveður dagskrá í samráði við borgarritara og stýrir fundum ráðsins. Á dagskrá skulu m.a. tekin mál sem fulltrúar í ráðinu hafa óskað eftir að tekin verði þar fyrir, enda séu þau á verksviði ráðsins. Fundir skulu boðaðir með a.m.k. sólarhrings fyrirvara og skal dagskrá fylgja fundarboði. Rafræn boðun fundar og útsending fundargagna telst fullgild boðun.

Heimilt er að taka mál til meðferðar í ráði þótt ekki sé það tilgreint á útsendri dagskrá, en skylt er þá að fresta afgreiðslu þess til næsta fundar sé þess óskað.

Um fundarsköp fer eftir samþykkt um stjórn Reykjavíkurborgar og fundarsköp borgarstjórnar nr. 715/2013, eftir því sem við á.

Borgarritari eða staðgengill hans og skrifstofustjóri skrifstofu þjónustu og reksturs skulu sitja fundi ráðsins með málfrelsi og tillögurétt. Þá getur ráðið boðað til fundar einstaka starfsmenn Reykjavíkurborgar, sem og aðra þá til sem það telur þörf á hverju sinni.

Fundaskipulag og ritun fundargerða

8. gr.

Ráðsfundur skal að jafnaði haldinn fyrir luktum dyrum og er þá óheimilt að greina opinberlega frá ummælum sem fram koma hjá einstökum fundarmönnum.

Ráðið skal halda gerðarbók og senda eftirrit fundargerða til borgarráðs jafnóðum. Um ritun fundargerða fer eftir verklagsreglum skrifstofu borgarstjórnar. Skrifstofa borgarstjóra og borgarritara sér um skrifstofuhald fyrir ráðið og leggur því til fundarritara.

Í upphafi árs skal kynna fundadagatal ráðsins. Þar komi m.a. fram tímasetning funda til undirbúnings starfs- og fjárhagsáætlunar og yfirferðar ársfjórðungsuppgjöra, ásamt tímasetningu opinna funda og samráðsfunda með hagsmunaaðilum, eftir því sem við á.

Samráð

9. gr.

Stjórnkerfis- og lýðræðisráð ber ábyrgð á upplýsingamiðlun og samráði við íbúa, félagasamtök og aðra hagsmunaaðila sem tengjast verkefnum ráðsins. Ráðið skal leita umsagna eða annars samráðs þegar við á og efni mála gefur tilefni til.

Við undirbúning veigamikillar stefnumörkunar til langs tíma skal leggja fram í ráðinu sérstaka áætlun um hvernig haga á samráði við stefnumótun.

Stjórnkerfis- og lýðræðisráði ber að halda a.m.k. einn opin fund á ári.

Fjármál

10. gr.

Stjórnkerfis- og lýðræðisráð fær fjárhagsramma vegna verkefna sem undir það heyra og felur skrifstofu borgarstjóra og borgarritara að vinna starfsáætlun og tillögur í frumvarp að fjárhagsáætlun í samræmi við stefnumótun og forgangsröðun ráðsins.

Ráðið afgreiðir starfsáætlun og hefur eftirlit með að tillögur í frumvarpi að fjárhagsáætlun séu í samræmi við starfsáætlun og mótaða stefnu.

Tillögur um breytingar á rekstrinum sem leiða til breytinga á gjaldskrá eða þjónustu skal sérstaklega skýra og rökstyðja. Formaður ráðsins og borgarritari kynna borgarráði starfsáætlun og tillögur í frumvarpi að fjárhagsáætlun.

Málsmeðferð

11. gr.

Við undirbúning mála og stjórnvaldsákvarðanir skal þess gætt að farið sé að stjórnarsýslulögum og verklagsreglum um stjórnarsýsluna.

Óski aðili máls frekari rökstuðnings eða beri hann fram kvörtun vegna afgreiðslu stjórnkerfis- og lýðræðisráðs skal honum leiðbeint um réttarstöðu sína, m.a. um heimild til að óska endurupptöku stjórnvaldsákvörðunar í borgarráði með hliðsjón af skilyrðum 24. gr. stjórnarsýslulaga nr. 37/1993. Telji borgarráð að skilyrði endurupptöku séu fyrir hendi skal stjórnkerfis- og lýðræðisráð taka málið upp að nýju.

Um hæfi kjörinna fulltrúa og starfsmanna vísast í samþykkt um stjórn Reykjavíkurborgar og fundarsköp borgarstjórnar nr. 715/2013 með síðari breytingum.

Samþykkt í borgarstjórn 3. október 2017